

詩

書

古

訓

詩書古訓卷三下

疾威上帝其命多辟

說苑至公夫公生明偏生暗端慤生達詐僞生
塞誠信生神夸誕生惑此六者君子之所慎也
而禹桀之所以分也詩云疾威上帝其命多僻
言不公也

天生烝民其命匪諶靡不有初鮮克有終

春秋左氏宣二年傳士季稽首而對曰人誰無過
過而能改善莫大焉詩曰靡不有初鮮克有終夫
如是則能補過者鮮矣君能有終則社稷之固也

豈惟羣臣賴之 襄三十一年傳北宮文子見令
尹圍之威儀言於衛侯曰令尹似君矣將有他志
雖獲其志不能終也詩云靡不有初鮮克有終終
之實難令尹其將不免

大戴禮記衛將軍文子在貧如客使其臣如藉不
遷怒不探怨不錄舊罪是冉雍之行也孔子曰有
士君子有衆使也有刑用也然後怒匹夫之怒惟
以亡其身詩云靡不有初鮮克有終以告之

晏子春秋諫上嬰問之能長保國者能終善者
也諸侯並立能終善者爲長列士並學能終善

者爲師詩曰靡不有初鮮克有終不能終善者
不遂其君

戰國策卷六王若負人徒之衆材兵革之強壹
毀魏氏之威而欲以力臣天下之主臣恐有後
患詩云靡不有初鮮克有終易曰狐濡其尾此
言始之易終之難也

韓詩外傳卷五繭之性爲絲弗得女工燔以沸
揚抽其統理不成爲絲卵之性爲雛不得良雞
覆伏孕育積日累久則不成爲雛夫人性善非
得明王聖主扶攜內之以道則不成爲君子詩

曰天生烝民其命匪訖靡不有初鮮克有終言
惟明王聖主然後使之然也 卷八官怠於有
成病加於小愈禍生於懈惰孝衰於妻子察此
四者慎終如始易曰小孤汔濟濡其尾詩曰靡
不有初鮮克有終 卷十卅莊子曰夫北以養
母也今母歿矣吾責塞矣吾聞之節士不以辱
生遂奔敵殺七十人而死君子聞之曰三北已
塞責又滅世斷宗士節小具矣而於孝未終也
詩曰靡不有初鮮克有終

漢書賈山傳今從豪俊之臣方正之士直與之

日日獵射擊兇伐狐巨傷大業絕天下之望臣
竊悼之詩曰靡不有初鮮克有終 左周黃傳
論向使廟堂納其高謀疆場宣其智力惟幄容
其審辭舉厝稟其成式則武宣之軌豈其遠而
詩云靡不有初鮮克有終可爲恨哉

流言以對寇攘式內

列女趙靈吳女傳主父遊沙丘官章以其徒作
亂李兌乃起四邑之兵擊章章走主父主父閉
之兌因圍主父官旣殺章乃相與謀曰以章圍
主父卽解兵吾屬夷矣詩曰流言以對寇攘式

內言不善之從內出也

不明爾德時無背無側爾德不明以無陪無卿

韓詩外傳卷五語曰淵廣者其魚大主明者其臣惠眼觀而志合必由其中故同明相見同音相聞同志相從非賢者莫能用賢故輔弼左右所仕使者有存亡之機得失之要也可無慎乎詩曰不明爾德時無背無側爾德不明以無陪無卿 卷八夫吞舟之魚大矣蕩而失水則爲螻蟻所制失其輔也故曰不明爾德時無背無側爾德不明以無陪無卿 卷十故曰有諤諤

爭臣者其國昌有默默諛臣者其國亡詩曰不
明爾德時無背無側爾德不明以無陪無卿言
文王咨嗟痛殷商無輔弼諫諍之臣而亡天下
矣

漢書五行志視之不明是謂不悉悉知也詩云
爾德不明曰亡陪亡卿不明爾德曰亡背亡仄
言上不明暗昧蔽惑則不能知善惡親近習長
同類亡功者受賞有罪者不殺百官廢亂失在
舒緩故其咎舒緩也

式號式呼俾晝作夜

說苑貴德人之有闕何哉比之狂惑疾病乎則不可面目人也而好惡多同人之闕誠愚惑失道者也詩云式號式呼俾晝作夜言闕行也

如蝸如蟻如沸如羹

漢書五行志言之不從從順也是謂不父父治也孔子曰君子居其室出其言不善則千里之外違之况其邇者虜詩云如蝸如蟻如沸如羹言上號令不順民心虛譁憤亂則不能治海內失在過差故其咎僭僭差也

匪上帝不時殷不用舊雖無老成人尙有典刑曾是

莫聽大命以傾

荀子非十二子篇遇君則修臣下之義遇鄉則
修長幼之義遇長則修子弟之義遇友則修禮
節辭讓之義遇賤而少者則修告導寬容之義
無不愛也無不敬也無與人爭也恢然如天地
之苞萬物如是則賢者貴之不肖者親之如是
而不服者則可謂詖怪狡猾之人矣雖則子弟
之中刑及之而宜詩云匪上帝不時殷不用舊
雖無老成人尙有典刑曾是莫聽大命以傾此
之謂也

鹽鐵論遵道文學曰上自五帝下及三王莫不
明德教謹庠序崇仁義立教化此百世不易之
道也殷周因修而昌秦王變法而亡詩云雖無
老成人尙有典刑言法教故沒而存之舉而貫
之貫而行之何更爲哉

說苑臣術故諫諍輔弼之人社稷之臣也明君
之所尊禮而闇君以爲已賊故明君之所賞闇
君之所殺也明君好問闇君好獨明君上賢使
能而享其功闇君畏賢妬能而滅其業罰其忠
而賞其賊夫是之謂至闇桀紂之所以亡也詩

云曾是莫聽大命以傾此之謂也

列女楚武鄧曼傳鄧曼曰大夫非衆之謂也其謂君撫小民以信訓諸司以德而威莫敖以刑也莫敖狃於蒲騷之役將自用也必小羅君若不鎮撫其不設備乎君子謂鄧曼爲知人詩云曾是莫聽大命以傾此之謂也

漢書外戚傳君子之道樂因循而重改作昔魯人爲長府閔子騫曰仍舊貫如之何何必改作蓋惡之也詩云雖亡老成人尙有典刑曾是莫聽大命以傾

言言 下言 卷三
枝葉未有害本實先撥

韓詩外傳卷五傳曰驕溢之君寡忠口惠之人
鮮信故盈把之木無合拱之枝榮澤之水無吞
舟之魚根淺則枝葉短本絕則枝葉枯詩曰枝
葉未有害本實先撥禍福自己出也

列女齊東郭姜傳君子曰東郭姜殺一國君而
滅三室又殘其身可謂不祥矣詩曰枝葉未有
害本實先敗此之謂也

殷鑒不遠在夏后之世

孟子離婁上暴其民甚則身弑國亡不甚則身危

國削名之曰幽厲雖孝子慈孫百世不能改也詩云殷鑒不遠在夏后之世此之謂也

國語周語太子晉諫曰天所崇之子孫或在畎畝由欲亂民也畎畝之人或在社稷由欲靖民也無有異焉詩曰殷鑒不遠近在夏后之世

韓詩外傳卷五故夏之所以亡者而殷爲之殷之所以亡者而周爲之故殷可以鑒于夏而周可以鑒于殷詩曰殷鑒不遠在夏后之世 卷十丈夫曰夫日日慎桃何患之有故亡國之社以戒諸侯庶人之戒在於桃及桓公說其言與

之其載來年正月庶人皆佩詩曰殷監不遠

漢書劉向傳懷不能已復上奏其辭曰臣聞帝
舜戒伯禹母若丹朱敖周公戒成王母若殷王
紂詩曰殷監不遠在夏后之世亦言湯曰桀爲
戒也 杜欽傳欽復重言詩云殷監不遠在夏
后氏之世刺戒者至迫近而省聽者常怠忽可
不慎哉 谷永傳詩云殷監不遠在夏后之世
願陛下追觀夏商周秦所已失之呂鏡考已行
有不合者臣當伏妄言之誅

抑衛武公刺厲王亦以自警也

國語楚語上左史曰昔衛武公年數九十有五矣
猶箴儆於國曰自卿以下至於師長士苟在朝者
無謂我老耄而舍我必恭恪於朝朝夕以交戒我
聞一二之言必誦志而納之以訓道我在輿有旅
賁之規位宁有官師之典倚几有誦訓之諫居寢
有瞽御之箴臨事有瞽史之道宴居有師工之誦
史不失書矇不失誦以訓御之於是乎作懿戒以
自儆也

抑抑威儀維德之隅

漢書馮奉世傳贊詩稱抑抑威儀惟德之隅宜

鄉侯參鞠躬履方擇地而行可謂淑人君子

後漢書東平憲王蒼傳惟陛下因行田野循視稼穡消搖仿佯弭節而旋至秋冬乃振威靈整法駕備周衛設羽旄詩云抑抑威儀惟德之隅人亦有言靡哲不愚

淮南子人間訓今知所以自行也而未知所以爲人行也其所論未之究者也有人能由昭昭於冥冥則幾於道矣詩曰人亦有言無哲不愚此之謂也

韓詩外傳卷六比干諫而死箕子曰知不用而

言愚也殺身以彰君之惡不忠也二者不可然
且爲之不祥莫大焉遂被髮佯狂而去君子聞
之曰勞矣箕子盡其精神竭其忠愛見比干之
事免其身仁知之至詩曰人亦有言靡哲不愚
有覺德行四國順之

孝經孝治章是以天下和平災害不生禍亂不作
故明王之以孝治天下也如此詩云有覺德行四
國順之

禮記緇衣子曰上好仁則下之爲仁爭先人故長
民者章志貞教尊仁以子愛百姓民致行己以說

其上矣詩云有桔德行四國順之

春秋左氏襄二十一年傳叔向曰祁大夫外舉不棄讐內舉不失親其獨遺我乎詩曰有覺德行四國順之夫子覺者也 昭五年傳仲尼曰叔孫昭子之不勞不可能也詩曰有覺德行四國順之

春秋繁露郊祭今爲其天子而闕然無祭於天
天何必善之所聞曰天下和平則災害不生今
災害生見天下未和平也天下所未和平者天
子之教化不行也詩曰有覺德行四國順之覺
者著也王者有明著之德行于世則四方莫不

響應風化善於彼矣

韓詩外傳卷五水淵深廣則龍魚生之山林茂盛則禽獸歸之禮義修明則君子懷之故禮及身而行修禮及國而政明能以禮扶身則貴名自揚天下願焉令行禁止而王者之事畢矣詩曰有覺德行四國順之夫此之謂也 卷六桓公曰吾聞之布衣之士不欲富貴不輕身於萬乘之君萬乘之君不好仁義不輕身於布衣之士縱夫子不欲富貴可也吾不好仁義不可也五往而得見也天下諸侯聞之謂桓公猶下布

衣之士而况國君乎於是相率而朝靡有不至
桓公之所以九合諸侯一匡天下者此也詩曰
有覺德行四國順之

列女魯義姑姊傳婦人曰已之子私愛也兄之
子公義也夫背公義而嚮私愛亡兄子而存妾
子幸而得幸則魯君不吾畜大夫不吾養庶民
國人不吾與也夫如是則脅肩无所容而累足
无所履也子雖痛乎獨謂義何故忍棄子而行
義不能无義而視魯國於是齊將按兵而止詩
云有覺德行四國順之此之謂也

敬慎威儀維民之則

春秋左氏襄三十一年傳北宮文子對曰詩云敬慎威儀惟民之則令尹無威儀民無則焉民所不則以在民上不可以終

諱詩外傳卷六如是則羣下百吏莫不修已然後敢安仕成能然後敢受職小人易心百姓易俗奸宄之屬莫不反慤夫是之爲政教之極則不可加矣詩曰訐謏定命遠猶辰告敬慎威儀惟民之則

列女秦穆姬傳君子曰慈母生孝子詩云敬慎

威儀維民之則穆姬之謂也

中論法象夫容貌者人之符表也符表正故性情治性情治故仁義存仁義存故盛德著盛德著故可以爲法象斯謂之君子矣詩云敬爾威儀惟民之則若夫墮其威儀恍其瞻視忽其辭令而望民之則我者未之有也

漢書匡衡傳蓋欽翼祗栗事天之容也溫恭敬遜承親之禮也正躬嚴恪臨衆之儀也嘉惠和說饗下之顏也舉錯動作物遵其儀故形爲仁義動爲法則大雅云敬慎威儀惟民之則

顛覆厥德荒湛于酒

韓詩外傳卷十管仲曰臣聞之酒入口者舌出
舌出者棄身與其棄身不甯棄酒乎桓公曰善
詩曰荒湛于酒

漢書五行志谷永對曰臣聞三代所忌喪亡者
皆繇婦人羣小湛湎於酒詩曰顛覆厥德荒湛
于酒

夙興夜寐洒掃庭內

韓詩外傳卷六子路治蒲三年孔子過之孔子
曰入其境田疇草萊甚辟此恭敬以信故民盡

力入其邑墉屋甚尊樹木甚茂此忠信以寬其
民不偷入其庭甚閑此明察以斷故民不擾也
詩曰夙興夜寐灑掃庭內

修爾車馬弓矢戎兵用戒戎作用邊蠻方

潛夫論勸將德稍弊薄邪心孳生次聖繼之觀
民設教坐爲誅賞以威勸之旣作五兵又爲之
憲以正厲之詩云修爾輿馬弓矢戈兵用戒作
則用逃蠻方

賢爾人民謹爾侯度用戒不虞

春秋左氏襄二十二年傳鄭公孫黑肱曰吾聞之

生於亂世貴而能貧民無求焉可以後亡敬共事
君與二三子生在敬戒不在富也已伯張卒君
子曰善哉詩曰慎爾侯度用戒不虞鄭子張其有
焉

韓詩外傳卷六古者有命民之有能敬長憐孤
取舍好讓居事力者告於其君然後君命得乘
飾輿駢馬未得命者不得乘飾車駢馬皆有罰
故民雖有餘財侈物而無禮義功德則無所用
故皆興仁義而賤財利賤財利則不爭不爭則
強不凌弱衆不暴寡是君之所以象典刑而民

莫犯法民莫犯法而亂斯止矣詩云質爾民人
謹爾侯度用戒不虞

鹽鐵論世務大夫曰事不豫辦不可以應卒內
無備不可以禦敵詩云詰爾民人謹爾侯度用
戒不虞故有文事必有武備

慎爾出話敬爾威儀

禮記緇衣子曰君子道人以言而禁人以行故言
必慮其所終而行必稽其所蔽則民謹於言而慎
於行詩云慎爾出話敬爾威儀

說苑君道陳靈公行僻而言失泄冶曰詩曰慎

爾出話敬爾威儀無不柔嘉此之謂也今君不
是之慎而縱姿焉不亡必弑

白圭之玷尚可磨也斯言之玷不可爲也

論語先進南容三復白圭

大戴禮記衛將軍文子獨居思仁公言言義其聞
之詩也一日三復白圭之玷是南宮緇之行也夫
子信其仁以爲異姓

禮記緇衣故君子寡言而行以成其信則民不得
大其美而小其惡詩云白圭之玷尚可磨也斯言
之玷不可爲也

春秋左氏僖九年傳君子曰詩所謂白圭之玷尙可磨也斯言之玷不可爲也荀息有焉

說苑說叢夫言行者君子之樞機樞機之發榮辱之本也可不慎乎故蒯子羽曰言猶射也括旣離弦雖有所悔焉不可從而追已詩曰白圭之玷尙可磨也斯言之玷不可爲也

無易由言無曰苟矣

韓詩外傳卷五孔子曰夫談說之術齋莊以立之端誠以處之堅強以待之辟稱以喻之分以明之歡忻芬芳以送之寶之珍之貴之神之如

是則說恒無不行矣夫是之謂能貴其所貴若夫無類之說不形之行不贊之辭君子慎之詩曰無易由言無曰苟矣 卷六夫不疏其指而弗知謂之隱外意外身謂之諱幾廉倚跌謂之移指緣謬辭謂之苟四者所不爲也故理可同睹也夫隱諱移苟爭言競爲而後息不能無害其爲君子也故君子不爲也論語曰君子於其言無所苟而已矣詩曰無易由言無曰苟矣無言不讎無德不報

禮記表記子曰以德報德則民有所勸以怨報怨

則民有所懲詩曰無言不讎無德不報

荀子富國篇今之世而不然厚刀布之斂以奪之財重田野之稅以奪之食苛關市之征以難其事不然而已矣有倚挈伺詐權謀傾覆以相顛倒以靡敝之百姓曉然皆知其汗漫暴亂而將大危亡也是以臣或弑其君下或殺其上粥其城倍其節而不死其事者無它故焉人主自取之詩曰無言不讐無德不報此之謂也 致士篇師術有四而博習不與焉尊嚴而憚可以爲師者艾而信可以爲師誦說而不陵不犯可

以爲師知微而論可以爲師故師有四術而博習不與焉水深則回樹落糞木弟子通利則思師詩曰無言不讐無德不報此之謂也

韓詩外傳卷十晏子曰王不見夫江南之樹乎名橘樹之江北則化爲枳何則地土使然爾夫子處齊之時冠帶而立儼有伯夷之廉今居楚而善盜意土地之化使然爾王又何怪乎詩曰無言不讐無德不報

春秋繁露郊祀對臣仲舒對曰武王崩成王立而在襁褓之中周公繼文武之業成二聖之功

德漸天地澤被四海故成王賢而貴之詩云無德不報故成王使祭周公以白牡上不得與天子同色下有異於諸侯仲舒愚以爲報德之禮列女周主忠妾傳勝婢曰殺主以自生又有辱主之名吾死則死耳豈言之哉君子謂忠妾爲仁厚夫名無細而不聞行無隱而不彰詩云無言不醜無德不報此之謂也

忠經報國章報國之道有四一曰貢賢二曰獻猷三曰立功四曰興利賢者國之幹猷者國之規功者國之將利者國之用是皆報國之道惟

其能而行之詩云無言不酬無德不報况忠臣之於國乎

漢書宣帝紀又曰朕微眇時御史大夫丙吉中郎將史曾史元長樂衛尉許舜侍中光祿大夫許延壽皆與朕有舊恩及故掖庭令張賀輔導朕躬修文學經術恩惠卓異厥功茂焉詩不云乎無德不報各曰恩深淺報之 王莽傳非特止此六子皆封詩曰亡言不讐亡德不報報當如之不如非報也

後漢書孝明帝紀詔曰三老李躬年耆學明五

更桓榮授朕尙書詩曰亡德不報亡言不酬

孫程傳中黃門孫程王康長樂太官丞王國中
黃門黃龍彭愷孟叔李建王成張賢史汎馬國
王道李元楊佗陳子趙封李剛魏猛苗光等懷
忠憤發戮力協謀遂埽滅元惡旨定王室詩不
云乎亡言不讐亡德不報 陳球傳竇太后崩
中常侍曹節王甫欲用貴人禮殯帝曰太后親
立朕躬統承大業詩云無德不報無言不酬豈
宜旨貴人終乎

惠于朋友庶民小子子孫繩繩萬民靡不承

韓詩外傳卷六吾語子夫服人之心高上尊貴
不以驕人聰明聖知不以幽人勇猛強武不以
侵人齊給便捷不以欺誣人不能則學不知則
問雖知必讓然後爲知遇君則修臣下之義出
鄉則修長幼之義遇長老則修弟子之義遇等
夷則修朋友之義遇少而賤者則修告道寬裕
之義故無不愛也無不敬也無與人爭也曠然
而天地苞萬物也如是則老者安之少者懷之
朋友信之詩曰惠于朋友庶民小子子孫繩繩
萬民靡不承

相在爾室尙不愧于屋漏

禮記中庸君子之所不可及者其惟人之所不見乎詩云相在爾室尙不愧于屋漏

無曰不顯莫子云覲

列女晉羊叔姬傳叔姬曰今躬與鮒童子也隨大夫而化者不可食以不義之肉不若埋之以明不與君子謂叔姬爲能防善遠疑詩曰無曰不顯莫子云覲此之謂也

神之格思不可度思矧可射思

禮記中庸使天下之人齊明盛服以承祭祀洋洋

乎如在其上如在其左右詩曰神之格思不可度
思矧可射思

淮南子泰族訓夫鬼神視之無形聽之無聲然
而郊天望山川禱祠而求福雩允而請雨卜筮
而決事詩云神之格思不可度思矧可射思此
之謂也

淑慎爾止不愆于儀

禮記緇衣子曰王言如絲其出如綸王言如綸其
出如紵故大人不倡游言可言也不可行君子弗
言也可行也不可言君子弗行也則民言不危行

而行不危言矣詩云淑慎爾止不僭于儀

列女宋恭伯姬傳伯姬常遇夜失火左右曰夫人少避火伯姬曰婦人之義保傅不來夜不下堂待保傅來也保母至矣傅母未至也左右又曰夫人少避火伯姬曰婦人之義傅母不至夜不可下堂越義求生不如守義而死遂逮於火而死春秋詳錄其事爲賢伯姬以爲婦人以貞爲行者也伯姬之婦道盡矣詩云淑慎爾止不愆于儀伯姬可謂不失儀矣

不僭不賊鮮不爲則

春秋左氏僖九年傳公孫枝對曰臣聞之唯則定國又曰不僭不賊鮮不爲則無好無惡不忌不克之謂也 昭元年傳文子曰且吾聞之能信不爲人下吾未能也詩曰不僭不賊鮮不爲則信也能爲人則者不爲人下矣

荀子臣道篇若夫忠信端慤而不害傷則無接而不然 是仁人之質也 忠信以爲質 端慤以爲統 禮義以爲文 倫類以爲理 喘而言 騰而動 而一可以爲法 則詩曰不僭不賊 鮮不爲則 此之

謂也

列女傳趙夫人傳夫人曰且吾聞之婦人執義
无二夫吾豈有二夫哉欲迎我何之以弟慢夫
非義也以夫怨弟非仁也吾不敢怨然亦不歸
遂泣而呼天自殺於靡笄之地代人皆懷之詩
云不僭不賊鮮不爲則此之謂也 邵陽友娣
傳季兒乃告其大女曰汝父殺吾兄義不可以
留又終不復嫁矣吾去汝而死善視汝兩弟遂
以繼自經而死馮翊王讓聞之大其義令縣復
其三子而表其墓詩曰不僭不賊鮮不爲則季
兒可以爲則矣

投我以桃報之以李

墨子兼愛下姑嘗本原先王之所書大雅之所道曰無言而不讐無德而不報投我以桃報之以李卽此言愛人者必見愛也而惡人者必見惡也

鹽鐵論和親其後王恢誤謀馬邑匈奴絕和親故當路結禍紛拏而不解兵連而不息邊民不解甲弛弩行數十年介冑而耕耘鋤耰而候望燧燔烽舉丁壯弧弦而出鬪老者超越而入葆言之足以流涕寒心則仁者不忍也詩云投我

以桃報之以李未聞善往而有惡來者

溫溫恭人維德之基

禮記表記子曰恭近禮儉近仁信近情敬讓以行此雖有過其不甚矣夫恭寡過情可信儉易容也以此失之者不亦鮮乎詩曰溫溫恭人惟德之基荀子不苟篇君子寬而不侵廉而不闕辯而不爭察而不激寡立而不勝堅彊而不暴柔從而不流恭敬謹慎而容夫是之謂至文詩曰溫溫恭人惟德之基此之謂矣 非十二子篇故君子恥不修不恥見汗恥不信不恥不見信恥不

能不恥不見用是以不誘於譽不恐於誹率道而行端然正己不爲物傾側夫是之謂誠君子詩云溫溫恭人維德之基此之謂也 君道篇故天子不視而見不聽而聰不慮而知不動而功塊然獨坐而天下從之如一體如四胛之從心夫是之謂大形詩曰溫溫恭人維德之基此之謂也

說苑修文行步中矩折旋中規立則磬折拱則抱鼓其以入君朝尊以嚴其以入宗廟敬以忠其以入鄉曲和以順其以入州里族黨之中和

以親詩曰溫溫恭人維德之基孔子曰恭近於禮遠恥辱也

列女晉趙衰妻傅姬以盾爲賢請立爲嫡子使三子下之以叔隗爲內婦姬親下之君子謂趙姬恭而有讓詩曰溫溫恭人維德之基趙姬之謂也

其維哲人告之話言順德之行

春秋左氏襄二年傳君子曰禮無所逆婦養姑者也虧姑以成婦逆莫大焉詩曰其惟哲人告之話言順德之行季孫於是不哲矣

新序雜事好學智也受規諫仁也江出汶山其源若甕口至楚國其廣十里無他故其下流多也人而好學受規諫宜哉其立也詩曰其惟哲人告之話言順德之行此之謂也

借曰未知亦既抱子

漢書霍光傳今陛下嗣孝昭皇帝後行淫辟不軌詩云藉曰未知亦既抱子五辟之屬莫大不孝

誨爾諄諄聽我藐藐匪用爲教覆用爲虐

中論虛道下愚反此道也以爲已既仁矣智矣

神矣明矣兼此四者何求乎衆人是以辜罪昭著腥德發聞百姓傷心鬼神怨痛曾不自口愈休如也若有告之者則曰斯事也徒生乎子心出乎子口於是刑焉戮焉辱焉禍焉不能免則曰與我異德故也未達我道故也又安足責是己之非遂初之繆至於身危國亡可痛矣夫詩曰誨爾諄諄聽之藐藐匪用爲教覆用爲虐

聽用我謀庶無大悔

列女齊靈仲子傳仲子曰夫光之立也列於諸侯矣今无故而廢之是專細諸侯而以難犯不

祥也君必悔之君子謂仲子明於事理詩云聽用我謀庶无大悔仲子之謂也

取譬不遠昊天不弔

列女周郊婦人傳周郊婦人遇郊尤之曰處則勸人爲禍行則數日而反是其過三歲乎君子謂周郊婦人惡尹氏之助亂知天道之不祐示以大期終如其言詩云取譬不遠昊天不弔此之謂也

四牡騤騤旟旐有翩亂生不夷靡國不泯

國語周語下太子晉諫曰今吾執政無乃實有所

避而滑夫三川之神使至於爭明以妨王官王而
飾之無乃不可乎詩曰四牡騤騤旃旒有翩亂生
不夷靡國不泯

誰生厲階至今爲梗

春秋左氏昭二十四年傳沈尹戌曰亡郢之始於
此在矣王一動而亡二姓之帥幾如是而不及郢
詩曰誰生厲階至今爲梗其王之謂乎

告爾憂恤誨爾序爵誰能執熱逝不以濯

孟子離婁上夫國君好仁天下無敵今也欲無敵
於天下而不以仁是猶執熱而不以濯也詩云誰

能執熱逝不以濯

春秋左氏襄三十一年傳北宮文子言於衛侯曰
鄭有禮其數世之福也其無大國之討乎詩云誰
能執熱逝不以濯禮之於政猶熱之有濯也濯以
救熱何患之有

墨子尙賢中何謂三本曰爵位不高則民不敬
也蓄錄不厚則民不信也政令不斷則民不畏
也故古聖王高予之爵重予之祿任之以事斷
予之令夫豈爲其臣賜哉欲其事之成也詩曰
告女憂卹誨女序爵孰能執熱鮮不用濯則此

語古者國君諸侯之不可以不執善承嗣輔佐也譬之猶執熟之有濯也將休其手焉

其何能淑載胥及溺

孟子離婁上苟不志於仁終身憂辱以陷於死亡詩云其何能淑載胥及溺此之謂也

韓詩外傳卷四今民相伍有罪相伺有刑相舉使搆造怨仇而民相殘傷和睦之心賊仁恩害士化所和者寡欲敗者巨於仁道泯焉詩曰其何能淑載胥及溺 卷六子曰不學而好思雖知不廣矣學而慢其身雖學不尊矣不以誠立

雖立不久矣誠未著而好言雖言不信矣美材也而不聞君子之道隱小物以害大物者災必及身矣詩曰其何能淑載胥及溺

稼穡維寶代食維好

韓詩外傳卷十公子晏子曰臣聞之王者藏于天下諸侯藏于百姓商賈藏于篋匱今百姓之於外短褐不蔽形糲糠不充口虛耗而賦斂無已王收大半而藏之臺是以天火之且臣聞之昔者桀殘賊海內賦斂無度萬民甚苦是故湯誅之爲天下戮笑今皇天降災於藏臺是君之

福也而不自知變悟亦恐君之爲隣國笑矣公
曰善自今已往請藏於百姓之間詩曰稼穡維
寶代食維好

天降喪亂滅我立王

韓詩外傳卷八於是君素服率羣臣而哭之旣
而祠焉河斯流矣君問伯宗何以知之伯宗不
言受輦者詐以自知詩曰天降喪亂滅我立王
卷十里克對曰數戰則民疲數勝則主驕驕
則恣恣則極上下俱極吳之亡猶晚矣此夫差
所以自喪於干遂詩曰天降喪亂滅我立王

靡有旅力以念穹蒼

韓詩外傳卷六民勞思佚治暴思仁刑危思安
國亂思天詩曰靡有旅力以念穹蒼

惟此惠君民人所瞻秉心宣猶考慎其相

列女明德馬后傳太后詔曰吾自束修冀欲上
不負先帝下不虧先人之德身服大練縑裙食
不求所甘左右旁人皆無香薰之飾但布帛耳
如是者欲身帥衆也君子謂德后在家則可爲
衆女師範在國則可爲母后表儀詩云惟此惠
君民人所瞻秉心宣猷考慎其相此之謂也

人亦有言進退維谷

晏子春秋問下且嬰聞君子之事君也進不失
忠退不失信不苟合以隱忠可謂不失忠不持
利以傷廉可謂不失信叔向曰善哉詩有之曰
進退維谷其此之謂歟

韓詩外傳卷六石他曰生亂世不得正行劫乎
暴人不得全義悲夫乃進盟以免父母退伏劍
以死其君詩曰人亦有言進退惟谷石先生之
謂也 卷十申鳴曰受君之祿避君之難非忠
臣也正君之法以殺其父又非孝子也行不兩

全名不兩立悲夫若此而生亦何以示天下之士哉遂自刎而死詩曰進退惟谷

維此聖人瞻言百里

韓詩外傳卷五百禮洽則百意遂百意遂則陰陽調陰陽調則寒暑均寒暑均則三光清三光清則風雨時風雨時則羣生寧如是而天道得夫是以不出戶而知天下不窺牖而見天道詩曰惟此聖人瞻言百里 卷十昔者太公望周公目受封而見太公問周公何以治魯周公曰尊尊親親太公曰魯從此弱矣周公問太公曰

何以治齊太公曰舉賢賞功周公曰後世必有
劫殺之君矣後齊日以大至于霸二十四世而
田氏代之魯日以削三十四世而亡由此觀之
聖人能知微矣詩曰惟此聖人瞻言百里

匪言不能胡斯畏忌

中論虛道夫酒食人之所愛者也而人相見莫
不進焉不吝於所愛者以彼之嗜之也使嗜者
甚於酒食人豈愛之故忠言之不出以未有嗜
之者也詩云匪言不能胡斯畏忌

漢書賈山傳秦皇帝居滅絕之中而不自知者

何也天下莫敢告也其所以莫敢告者何也亡
養老之義亡輔弼之臣亡進諫之士縱恣行誅
退誹謗之人殺直諫之士是呂道諛媮合苟容
比其德則賢於堯舜課其功則賢於湯武天下
已潰而莫之告也詩曰匪言不能胡此畏忌聽
言則對譖言則退此之謂也

民之貪亂寗爲荼毒

禮記坊記子曰貧而好樂富而好禮衆而以寗者
天下其幾矣詩云民之貪亂寗爲荼毒

國語周語下太子晉諫曰又曰民之貪亂寗爲荼

毒夫見亂而不惕所殘必多其飾彌章民有怨亂
猶不可遏而况神乎

荀子儒效篇凡人莫不欲安榮而惡危辱故唯
君子爲能得其所好小人則日徼其所惡詩曰
維此良人弗求弗廸維彼忍心是顧是復民之
貪亂寔爲荼毒此之謂也

維彼不順征以中垢

韓詩外傳卷五故曰以明扶明則昇於天以明
扶闇則歸其人兩瞽相扶不傷牆木不陷井窞
則其幸也詩曰惟彼不順往以蟲垢闇行也

大風有隧貪人敗類聽言則對誦言如醉匪用其良
覆俾我悖

春秋左氏文元年傳秦大夫及左右皆言於秦伯
曰是敗也孟明之罪也必殺之秦伯曰是孤之罪
也周芮良夫之詩曰大風有隧貪人敗類聽言則
對誦言如醉匪用其良覆俾我悖是貪故也孤之
謂矣

韓詩外傳卷五夫土地之生不益山澤之出有
盡懷不富之心而求不益之物挾百倍之欲而
求有盡之財是桀紂之所以失其位也詩曰大

風有隧食人敗類 卷六故先生者當年霸楚

莊王是也後生者三年而復宋昭公是也不生者死中野爲虎狼所食郭君是也有先生者後生者有不生者詩曰聽言則對誦言如醉

列女晉羊叔姬傳叔姬之始生叔魚也而視之曰是虎目而豕喙鳶肩而牛腹谿壑可盈是不可饜也必以賂死叔姬可謂智矣詩云貪人敗類此之謂也

潛夫論班祿是以賢者不能行禮以從道品臣不能無枉以從利君又驟赦以縱賦民無耻而

多盜竊何者威氣加而化上風患害切而迫饑
寒此絕滅所以不能詰其盜者也詩云大風有
隧貪人敗類爾之教矣民斯效矣

雲漢仍叔美宣王也

春秋繁露郊祀周宣王時天下旱歲惡甚王憂
之其詩曰倬彼雲漢昭回于天王曰嗚乎何辜
今之人天降喪亂饑饉薦臻靡神不舉靡愛斯
牲珪璧既卒甯莫我聽旱既太甚蘊隆蟲蟲不
殄禋祀自郊徂宮上下奠瘞靡神不宗后稷不
克上帝不臨耗射下土甯丁我躬宣王自以爲

不能乎后稷不中乎上帝故有此災

自郊徂宮

後漢書楊秉傳王者至尊出入有常警蹕而行
靜室而止自非郊廟之事則鑾旗不駕故詩稱
自郊徂宮

上下奠瘞靡神不宗

說苑君道湯之時大旱七年雒圻川竭煎沙爛
石於是使人持三足鼎祝山川教之祝曰政不
節耶使人疾耶苞且行耶讒夫昌耶宮室營耶
女謁盛耶何不雨之極也蓋言未已而天大雨

故天之應人如影之隨形響之效聲者也詩云
上下奠瘞靡神不宗言疾旱也

周餘黎民靡有子遺

孟子萬章上故說詩者不以文害辭不以辭害志
以義逆志是爲得之如以辭而已矣雲漢之詩曰
周餘黎民靡有子遺信斯言也是周無遺民也

崧高維嶽駿及于天維嶽降神生甫及申維申及甫
維周之翰四國于蕃四方于宣

禮記孔子閒居清明在躬氣志如神者欲將至有
開必先天降時雨山川出雲其在詩曰崧高維嶽

峻極于天維嶽降神生甫及申維申及甫爲周之翰四國于蕃四方于宣此文武之德也

疊疊申伯王纘之事于邑于謝南國是式

潛夫論三式周宣王時輔相大臣以德佐治亦獲有國故尹吉甫作封頌二篇其詩曰疊疊申伯王纘之事于邑于謝南國是式 志氏姓或封於申城在南陽宛北序山之下故詩云疊疊申伯王薦之事于邑于序南國爲式

周邦咸喜戎有良翰

韓詩外傳卷八昔者周德大衰道廢於厲申伯

仲山甫輔相宣王撥亂世反之正天下畧振宗廟復興申伯仲山甫乃竝順天下匡救邪失喻德教舉遺士海內翕然向風故百姓勃然詠宣王之德詩曰周邦咸喜戎有良翰又曰邦國若否仲山甫明之旣明且哲以保其身夙夜匪懈以事一人如是可謂救世矣

天生烝民有物有則民之秉彜好是懿德

孟子告子上仁義禮智非由外鑠我也我固有之也弗思耳矣故曰求則得之舍則失之或相倍蓰而無算者不能盡其才者也詩曰天生蒸民有物

有則民之秉夷好是懿德孔子曰爲此詩者其知道乎故有物必有則民之秉夷也故好是懿德

韓詩外傳卷六大雅曰天生蒸民有物有則民之秉彝好是懿德言民之秉德以則天也

潛夫論德化是故凡立法者非以司民短而誅過誤乃以防姦惡而救禍敗檢淫邪而內正道爾詩云民之秉夷好是懿德

令儀令色小心翼翼古訓是式威儀是力

列女宋鮑女宗傳女宗曰且婦人有七見去夫無一去義七去之道妬正爲首淫僻竊盜長舌

驕侮無子惡病皆在其後吾媿不教吾以居室之禮而反欲使吾爲見棄之行將安所用此遂不聽事姑愈謹君子謂女宗謙而知禮詩云令儀令色小心翼翼故訓是式威儀是力此之謂也

赫赫王命仲山甫將之邦國若否仲山甫明之

韓詩外傳卷六王者必立牧方二人使闕遠牧衆也遠方之民有飢寒而不得衣食有獄訟而不平其寃失賢而不舉者入告乎天子天子於其君之朝也揖而進之曰噫朕之政教有不得

爾者耶何如乃有飢寒而不得衣食有獄訟而
不平其寃失賢而不舉然後其君退而與其卿
大夫謀之遠方之民間之皆曰誠天子也夫我
居之僻見我之近也我居之幽見我之明也可
欺乎哉故牧者所以開四目通四聰也詩曰邦
國若否仲山甫明之此之謂也

後漢書郎顛傳臣聞剡舟刻楫將欲濟江海也
聘賢選佐將呂安天下也昔唐堯在上羣龍爲
用文武劄德周召作輔是呂能建天地之功增
日月之耀者也詩云赫赫王命仲山甫將之邦

國若否仲山甫明之宣王是賴呂致雍熙

既明且哲以保其身

禮記中庸是故居上不驕爲下不倍國有道其言足以興國無道其默足以容詩曰既明且哲以保其身其此之謂與

晏子春秋問下叔向問晏子曰人何以則可謂保其身晏子對曰詩曰既明且哲以保其身夙夜匪懈以事一人不庶幾不要幸先其難乎而後幸得之時其所也失之非其罪也可謂保其身矣

荀子堯問篇當是時也知者不得慮能者不得治賢者不得使故君上蔽而無睹賢人距而不受然則孫卿懷將聖之心蒙佯狂之色視天下以愚詩曰既明且哲以保其身此之謂也

韓詩外傳卷八人得氣則生失氣則死其氣非金帛珠玉也不可求於人也非縉布五穀也不可雜買而得也在吾身耳不可不慎也詩曰既明且哲以保其身

列女曹僖氏妻傳負羈之妻言於夫曰今其從者皆卿相之僕也則其君必霸王之主也若加

禮焉必能報施矣若有罪焉必能討過子不早圖禍至不久矣君子謂僖氏之妻能遠識詩云既明且哲以保其身此之謂也

漢書蓋寬饒傳太子庶子王生子書曰夫君子直而不挺曲而不詘大雅云既明且哲曰保其身狂夫之言聖人擇焉唯裁省覽

夙夜匪解以事一人

孝經卿大夫章是故非法不言非道不行口無擇言身無擇行言滿天下無口過行滿天下無怨惡三者備矣然後能守其宗廟蓋卿大夫之孝也詩

云夙夜匪懈以事一人

春秋左氏文三年傳孟明之臣也其不解也能懼思也夙夜匪懈以事一人孟明有焉 襄二十五
年傳大叔文子聞之曰詩曰夙夜匪懈以事一人
今甯子事君不如奕棋其何以免乎

韓詩外傳卷八荆蒯芮曰吾聞之食其食死其事吾既食亂君之食又安得治君而死之遂驅車而入死其事詩曰夙夜匪懈以事一人荆先生之謂也 曰賜欲休於事君孔子曰詩云夙夜匪懈以事一人爲之若此其不易也若之何

其休也

漢書董仲舒傳仲舒對曰白非大亡道之世者
天盡欲扶持而全安之事在彊勉而已矣彊勉
學問則聞見博而知益明彊勉行道則德日起
而大有功此皆可使還至而立有效者也詩曰
夙夜匪解書云茂哉茂哉皆彊勉之謂也 王
莽傳開門延士下及白屋婁省朝政綜管衆治
親見牧守呂下考迹雅素審知白黑詩云夙夜
匪解呂事一人公之謂矣

漢紀卷二十八初丞相秦之制本次國命卿故

置左右丞相故三公之官詩云夙夜匪懈以重
一人一人者謂天子也

柔亦不茹剛亦不吐

春秋左氏文十年傳子舟曰當官而行何彊之有
詩曰剛亦不吐柔亦不茹是亦非辟彊也

韓詩外傳卷六楚莊王伐鄭鄭伯肉袒左把茅
旌右執鸞力以進莊王受節左右麾楚軍退舍
七里既晉之救鄭者至乃遂還師以逆晉寇莊
王援桴而鼓之晉師大敗莊王曰噫吾兩君不
相好百姓何罪乃退楚師以佚晉寇詩云柔亦

不茹剛亦不吐 卷八遜而直上也切次之謗
諫爲下懦爲死詩曰柔亦不茹剛亦不吐 仇
牧聞君弑趨而至遇之於門手劍而叱之萬臂
搬仇牧碎其首齒著乎門闔仇牧可謂不畏強
禦矣詩曰惟仲山甫柔亦不茹剛亦不吐
不侮矜寡不畏彊禦

春秋左氏昭元年傳叔向曰且夫以千乘去其國
彊禦已甚詩曰不侮鰥寡不畏彊禦 定四年傳
辛曰君討臣誰敢讐之君命天也若死天命將誰
讐詩曰柔亦不茹剛亦不吐不侮矜寡不畏彊禦

唯仁者能之

韓詩外傳卷六君子崇人之德揚人之美非道
諛也正言直行指人之過非毀疵也訕柔順從
剛強猛毅與物周流道德不外詩曰柔亦不茹
剛亦不吐不侮矜寡不畏強禦 子夏曰所貴
爲士者上攝萬乘下不敢敖乎匹夫外立節矜
而敵不侵擾內禁殘害而君不危殆是士之所
長君子之所致貴也於是靈公避席抑手曰寡
人雖不敏請從先生之勇詩曰不侮矜寡不畏
強禦卜先生也

漢書王莽傳孝哀卽位高昌侯董宏希指求美
造作二統公手劾之呂定大綱建白定陶太后
不宜在乘輿幄坐呂明國體詩曰柔亦不茹剛
亦不吐不侮鰥寡不畏強圉公之謂矣

德輶如毛民鮮克舉之我儀圖之維仲山甫舉之愛
莫助之

禮記中庸子曰聲色之於以化民末也詩曰德輶
如毛 表記子曰中心安仁者天下一人而已矣
大雅曰德輶如毛民鮮克舉之我儀圖之惟仲山
甫舉之愛莫助之

荀子彊國篇霸者之善箸焉可以時託也王者
之功名不可勝日志也財物貨寶以大爲重政
教功名反是能積微者速成詩曰德輶如毛民
鮮克舉之此之謂也

春秋繁露玉英匹夫之反道以除咎尙難人主
之反道以除咎甚易詩云德輶如毛言其易也
韓詩外傳卷五德也者包天地之美配日月之
明立乎四時之調覽乎陰陽之交寒暑不能動
四時不能化也斂乎太陰而不濕散乎太陽而
不枯鮮潔清明而備嚴威務疾而神競清而福

乎天地之間者德也微聖人其孰能與於此矣
詩曰德輶如毛民鮮克舉之

衮職有闕維仲山甫補之

春秋左氏宣二年傳士季稽首而對曰人誰無過
過而能改善莫大焉又曰衮職有闕惟仲山甫補
之能補過也君能補過衮不廢矣

四牡彭彭八鸞鏘鏘王命仲山甫城彼東方

潛夫論三式又曰四牡彭彭八鸞鏘鏘王命仲
山甫城彼東方此言申伯山甫文德致昇平而
王封以樂土賜以盛服也

諸娣從之。祁祁如雲。韓侯顧之，爛其盈門。

白虎通：嫁娶，姪娣年雖少，猶從適人者，明人君無再娶之義也。詩云：「姪娣從之，祁祁如雲。」韓侯顧之，爛其盈門。

蹶父孔武，靡國不到。爲韓姑相攸，莫如韓樂。

春秋左氏成九年傳：季文子如宋，致女，復命公享。

之賦，韓奕之五章。

註：韓奕詩大雅篇名，其五章言蹶父嫁女於韓侯，爲女相所居。

莫如韓樂，文子喻魯侯有蹶父之德，宋公如韓侯，宋土如韓樂。

魴鱣，甫甫麇鹿，嘖嘖。

孔叢子廣訓：魴鱣，甫甫語其大也。麇鹿麇麇語。

其衆也

溥彼韓城燕師所完

潛夫論志氏姓昔周宣王亦有韓侯其國也近
燕故詩云普彼韓城燕師所完

文武受命召公維翰

白虎通王者不臣禮服傳曰子得爲父臣者不
遺善之義也詩云文武受命召公維翰召公文
王子也

肇敏戎功用錫爾祉

後漢書周舉傳故光祿大夫周舉性倅夷魚忠

踰隨管前授牧守及還納言出入京輦有欽哉
之績在禁闈有密靜之風子錄乃勲用登九列
方欲式序百官亮協三事不承夙終用乖遠圖
朝廷愍悼良爲愴然詩不云乎肇敏戎功用錫
爾祉其令將大夫曰下到喪發日復會弔加賜
錢十萬以旌委蛇素絲之節焉

釐爾圭瓚秬鬯一卣

韓詩外傳卷八傳曰諸侯之有德天子錫之一
錫車馬再錫衣服三錫虎賁四錫樂器五錫納
陛六錫朱戶七錫弓矢八錫鈇鉞九錫秬鬯詩

曰釐爾圭瓚秬鬯一卣

明明天子令聞不已矢其文德洽此四國

禮記孔子閒居三代之王也必先其令聞詩云明明天子令聞不已三代之德也弛其文德協此四國大王之德也

春秋繁露竹林今戰伐之於民其爲害幾何攷意而觀指則春秋之所惡者不任德而任力驅民而殘賊之其所好者設而勿用仁義以服之也詩云弛其文德洽此四國此春秋之所善也

王命卿士南仲大祖

白虎通爵封諸侯於廟者示不自專也明法度
皆祖之制也舉事必告焉詩云王命卿士南仲
太祖

王謂尹氏命程伯休父

潛夫論志氏姓故重黎氏世序天地別其分主
以歷三代而封於程其在周世爲宣王大司馬
誇美王謂尹氏命程伯休父

縣縣翼翼不測不克

韓詩外傳卷八子貢曰臣譽仲尼譬猶兩手捧
土而附泰山其無益亦明矣使臣不與仲尼譬

猶兩手把泰山無損亦明矣景公曰善豈其然
豈其然詩曰綿綿翼翼不測不克

王猶允塞徐方既來

荀子君道篇故械數者治之流也非治之原也
君子者治之原也官人守數君子養原原清則
流清原濁則流濁故上好禮義尙賢使能無貪
利之心則下亦將綦辭讓致忠信而謹於臣子
矣故籍歛忘費事業忘勞寇難忘死城郭不待
餘而固兵刃不待陵而勁敵國不待服而誅四
海之民不待令而一夫是之謂至平詩曰王猷

允塞徐方既來此之謂也 議兵篇雕雕焉縣

貴爵重賞於其前縣明刑大辱於其後雖欲無

化能乎哉故民歸之如流水所存者神所為者

化而順暴悍勇力之屬為之化而愿旁辟曲私

之屬為之化而公矜糾收繚之屬為之化而調

夫是之謂大化至一詩曰王猷允塞徐方其來

此之謂也

韓詩外傳卷六必修禮以齊朝正法以齊官平

政以齊下然後禮義節奏齊乎朝法則度量正

乎官忠信愛利平乎下行一不義殺一無罪而

得天下不爲也故近者競親而遠者願至上下
一心三軍同力名聲足以薰炙之威強足以一
齊之則拱揖指麾而強暴之國莫不趨使如赤
子歸慈母者何也仁形義立教誠愛深故詩曰
王猷允塞徐方旣來夫不降席而匡天下者
求之已也孔子曰其身正不令而行其身不正
雖令不從先王之所以拱揖指麾而四海來賓
者誠德之至也色以形於外也詩曰王猷允塞
徐方旣來襄子曰吾聞之於叔向曰君子不
乘人於利不厄人於險使其城然後攻之中牟

聞其義而請降曰善哉襄子之謂也詩曰王猷
允塞徐方既來

漢書功臣表昔書稱蠻夷帥服詩云徐方既俶
春秋列潞子之爵許其慕諸夏也 嚴助傳淮
南王安上書諫曰陛下垂德惠以覆露之使元
元之民安生樂業則澤被萬世傳之子孫施之
無窮天下之安猶泰山而四維之也夷狄之地
何足以爲一日之閒而煩汗馬之勞乎詩云王
猶允塞徐方既來言王道甚大而遠方懷之也
徐方既同天子之功

荀子非相篇故君子賢而能容罷知而能容愚
博而能容淺粹而能容雜夫是之謂兼術詩曰
徐方既同天子之功此之謂也

彼宜有罪女覆說之

潛夫論述赦天下本以民不能相治故爲立王
者以統治之天下在於奉天威命其行賞罰詩
刺彼宜有罪汝反脫之

哲夫成城哲婦傾城

晏子春秋諫上且賢良廢滅孤寡不振而聽嬖
妾以祿御夫以蓄怨與民爲讐之道也詩曰哲

夫成城哲婦傾城今君不免成城之求而惟傾城之務國之亡日至矣君其圖之

懿厥哲婦爲梟爲鴟

列女夏桀末喜傳美於色薄於德亂孽无道女子行大夫心佩劔帶冠詩曰懿厥哲婦爲梟爲鴟此之謂也

漢書谷永傳臣聞三代所已隕社稷喪宗廟者皆由婦人詩曰懿厥哲婦爲梟爲鴟匪降自天生自婦人

婦有長舌維厲之階

列女晉獻驪姬傳於是驪姬乃說公曰曲沃君之宗邑也蒲與二屈君之境也不可以無主宗邑無主則民不畏邊境無主則開寇心夫寇生其心民媿其政國之患也若使太子主曲沃二公子主蒲與二屈則可以威民而懼寇矣詩曰婦有長舌惟厲之階又曰哲婦傾城此之謂也亂匪降自天生自婦人

列女魯桓文姜傳文姜與襄公通桓公怒禁之不止文姜以告襄公襄公享桓公酒醉之使公子彭生抱而乘之因拉其脅而殺之遂死於車

詩曰亂匪降自天生自婦人此之謂也

匪教匪誨時維婦寺

列女齊靈聲姬傳時國佐相靈公會諸侯于柯
陵高子鮑子處內守及還將至閉門而索客孟
子訴之曰高鮑將不納君而欲立公子角國佐
知之公怒刖鮑牽而逐高子國佐及靈公薨高
鮑皆復遂殺孟子齊亂乃息詩云匪教匪誨時
維婦寺此之謂也

婦無公事休其蠶織

列女魯季敬姜傳敬姜歎曰今我寡也爾又在

下位朝夕處事猶恐忘先人之業况有怠惰其
何以辟吾冀汝朝夕修我曰必无廢先人爾今
也曰胡不自安以是承君之官余懼穆伯之絕
祀也仲尼聞之曰弟子記之季氏之婦不淫矣
詩曰婦无公事休其蠶織言婦人以織績爲公
事者也休之非禮也

人之云亡邦國殄瘁

春秋左氏文六年傳君子曰秦穆之不爲盟主也
宜哉死而棄民先王違世猶詒之法而况奪之善
人乎詩曰人之云亡邦國殄瘁無善人之謂若之

何奪之 襄二十六年傳歸生聞之與其失善甯
其利淫無善人則國從之詩曰人之云亡邦國殄
瘁無善人之謂也

韓詩外傳卷六昔者秦繆公困於殺疾據五穀
大夫蹇叔公孫支而小霸晉文困於驪氏疾據
咎犯趙衰介子推而遂爲君越王勾踐困於會
稽疾據范蠡大夫種而霸南國齊桓公困於長
勺疾據管仲甯戚隰朋而匡天下此皆困而知
疾據賢人者也夫困而不知疾據賢人而不亡
者未嘗有之也詩曰人之云亡邦國殄瘁無善

人之謂也

漢書王莽傳而公被胥原之詆遠去就國朝政崩壞綱紀廢弛危亡之禍不隨如髮詩云人之云亡邦國殄頽公之謂矣

人之云亡心之憂矣

春秋左氏昭二十五年傳樂祁曰政在季氏三世矣魯君喪政四公矣無民而能逞其志者未之有也國君是以鎮撫其民詩曰人之云亡心之憂矣心之憂矣甯自今矣

列女嚴延年母傳謂延年曰天道神明人不可

獨殺我不自意老當見壯子被刑戮也行矣去
汝東海掃除墓地耳君子謂嚴母仁智信道詩
云心之憂矣甯自全矣其嚴母之謂也

昊天疾威天篤降喪瘠我饑饉民卒流亡

韓詩外傳卷六夫道德之威成乎衆強暴察之
威成乎危弱狂妄之威成乎滅亡故威名同而
吉凶之効遠矣故不可不審察也詩曰昊天疾
威天篤降喪瘠我饑饉民卒流亡

我居圉卒荒

韓詩外傳卷八一穀不升謂之饑二穀不升謂

之飢三穀不升謂之饑四穀不升謂之荒五穀
不升謂之大侵大侵之禮君食不兼味臺榭不
飾道路不除百官補而不制鬼神禱而不祠此
大侵之禮也詩曰我居御卒荒此之謂也
如彼歲旱草不潰茂

韓詩外傳卷五如歲之旱莫不潰茂然天淳然
興雲沛然下雨則萬物無不興起之者民非無
仁義根於心者也王政怵迫使不得見憂鬱而
不得出聖王在彼躡視不出閣而天下隨唱
而天下和何如在此有以應哉詩曰如彼歲旱

莫不潰茂

池之竭矣不云自頻泉之竭矣不云自中

列女趙飛燕姊妹傳君子謂趙昭儀之凶嬖與
褒姒同行成帝之惑亂與周幽王同風詩云池
之竭矣不云自濱泉之竭矣不云自中成帝之
時舅氏擅外趙氏專內其自竭極蓋亦池泉之
勢也

從弟阮先校字